

Inuussutissarsiummik ingerlataqarneq pillugu Inatsisartut inatsisaat nr. 29, 9. december 2015-imeersoq

Kapitali 1

Atuuffia

§ 1. Inatsit nioqqutissanik tuniniaanermi namminersorluni inuussutissarsiummik ingerlataqarnermut atuuppoq.

Kapitali 2

Aalajangersakkat nalinginnaasut

§ 2. Inuussutissarsiummik ingerlataqartut IIN-imi normu kiisalu piginnittup aqqa najugaalu allallugit pisiniartunut ersarissumut allagarsiissapput.

Imm. 2. Nuisitsivimmi, saqqummersitsivimmi, timersortartut katerisimaarneranni niuffaffimmilu tuniniaanermi aqqissuisoq kingusinnerpaamik aqqissuussinerup ammarnerani inuussutissarsiummik ingerlataqartut aqqi, najugai aamma IIN-imi normua allallugit allattuiffiliorsimassaaq. Allattuiffik aqqissuussinerup matoreernerata kingorna ukiuni tallimani paarineqassaaq aammalu nakkutilliinermut oqartussaasunut piumasarineqartillugu tunniunneqassaaq. Peqataasoq IIN-imi normumik peqarnissamik pisussaaffeqanngippat taamaallaat aqqa najugaalu allanneqassapput.

§ 3. Tupanik nioqqutissiat, imigassat 1,21 procentimik annertunermillu aalakoornartortaqtut, tipigissaatit aamma kusanarsaatit, imeruersaatit kiisalu sukkulaatinik sukkunillu nioqqutissiat tuniniaavinnit piffissami minnerpaamik qaammatini sisamani ataannartuni minnerpaamik sapaatip akunneranut ataasiarluni tuniniaaviusartuni taamaallaat tuniniarneqarsinnaapput.

Imm. 2. Taamaattorli assersuutigalugu niuffaffinnik, saqqummersitsinernik, timersornermik pisoqarfinnik saqqummersitsillunilu tuniniaavinnik ingertaqarfiusunut atatillugu nioqqutissanik taakkunanga tunisaqarnermi tamanna atuutinngilaq.

Imm. 3. Imm. 1-imi aalajangersagaq nunanut allanut timmisartukkut attaveqarlutik mittarfinni akitsuutitaqanngitsunik – Taxfreenik – tunisinermut atuutinngilaq.

Kapitali 3

Nakkutilliineq

§ 4. § 2-mi aalajangersakkap naapertuutsinneqarnissaanik Atuisartoqarnermut Unammilleqatigiinnermullu Aqutsisoqarfik nakkutilliisuvoq. Atuisartoqarnermut Unammilleqatigiinnermullu Aqutsisoqarfik aalajangersakkamik unioqqutitsisoqarneranik paasinnippat, Atuisartoqarnermut Unammilleqatigiinnermullu Aqutsisoqarfik politimesterimut unnerluusseqqusilluni qinnuteqarsinnaavoq.

Imm. 2. § 3-mi aalajangersakkap naapertuutsinneqarneranik Akileraartarnermut Aqutsisoqarfik nakkutilliisuvoq, aammalu eqqartuussivimmi aalajangiisoqanngikkaluartoq sukumiisumik kinaassutsimut uppersaammik takutitsinikkut qaqugumulluunniit nioqqutissanik tuniniaanermik ingerlatsiviusuni inini, biilini il.il. nakkutilliinermik suliaqarsinnaavoq.

Imm. 3. Piginnittoq, inuillu tassani suliffeqartuusut imm. 1 aamma 2 malillugit nakkutilliinerit ingerlannerini oqartussaasunut pisariaqartumik ilitsersuissapput ikiuutissallutillu.

Kapitali 4

Pineqaatissiisarnermut aalajangersakkat

§ 5. § 2, imm. 1-3-mik aamma § 3, imm. 1-imik unioqqutitsinerit Kalaallit Nunaanni pinerluttulerinermut inatsimmi maleruagassat malillugit akiliisitsinikkut pineqaatissiinernik malitseqarsinnaapput.

Imm. 2. Pissutsit sukannernerusimappata imaluunniit uteqqittumik pisoqartillugu kaaviaartitassatut naatsorsuutigineqartumut imaluunniit pissarsiarineqartumut naapertuuttumik akileeqqusissuteqarluni pineqaatissiisoqarsinnaavoq.

Imm. 3. Inatsisartut inatsisaanni akileeqqusissummik aalajangersaanissamik tungavissiisoqarsimappat, Kalaallit Nunaanni pinerluttulerinermut inatsimmi maleruagassat malillugit inuit pisussaataasut pisinnaatitaasullu akileeqqusissuteqarnikkut pineqaatissinneqarsinnaapput.

Imm. 4. Akileeqqusissutit inatsisartut inatsisaat malillugit aalajangersarneqartut Nunap Karsianut tutsinneqassapput.

Kapitali 5

Atortuulersitsinermut ikaarsaariarnermilu aalajangersakkat

§ 6. Inuussutissarsiummik ingerlataqarnermut allagartaqarnissaq inatsisaasuni allani piumasqaataappat piumasqaatit taakku IIN-normumik uppersaateqarnikkut naammassineqassapput.

Imm. 2. Inatsisini allani piumasqaataappat inuk imaluunniit inatsisit naapertorlugit inuk

inuussutissarsiummut allagartartaanissamut piunasaqaatinik naammassinnittoq pineqarpat, piunasaqaat taanna naammassineqartutut isigineqassaaq, Kalaallit Nunaanni pinerluttulerinermut inatsimmi kapitali 36-mi maleruagassat naapertorlugit pisinnaatitaaffiigaasoqarsimanngippat.

§ 7. Inatsisartut inatsisaat ulloq 1. januar 2016 atuutilerpoq.

Imm. 2. Tamatuma peqatigisaanik Kalaallit Nunaanni inuussutissarsiummik ingerlataqarneq pillugu Inatsisartut inatsisaat nr. 12, 12. november 2001-imeersoq atorunnaarsinneqarpoq.

Namminersorlutik Oqartussat, ulloq 9. december 2015

Kim Kielsen